

**ՄԻՋԻՆ ԽԱՎՐ ՀԱՅԱՍՏԱՆՈՒՄ**

(քանակական վերլուծություն և հիմնական բնութագրիչները )

**ՄԵԼՔՈՒՄՅԱՆ ՅՈՒ. Գ.**

Հասարակության կառուցվածքի և շերտավորման հիմնահարցերը, որոնք ներկայումս սոցիոլոգիայի ուսումնասիրության առարկաներից են, հետաքրքրում էին մտածողներին դեռևս հնագույն ժամանակներից. այդ հարցի շուրջ իրենց տեսական հայեցակարգերն են կառուցել Պլատոնը և Արիստոտելը: Այն արդիական է նաև այսօր, երբ Պ. Բուրդյեն, Դ. Բեյլը, Ա. Ինքելսը և մյուսները քննարկում և վերլուծում են արդեն հետարդյունաբերական հասարակությունների կառուցվածքը:

Պլատոնը անտիկ հասարակության կառուցվածքի մեջ առանձնացնում էր 3 խավ՝ վերին խավ կամ վերնախավ (կառավարության անդամ իմաստուններ), միջին խավ (զինվորականներ) և ստորին խավ (գյուղացիներ, արհեստավորներ):

Արիստոտելը զարգացած հասարակության ձևավորման գործընթացում ընդգծում էր աշխատանքի բաժանման առանձնահատուկ դերը: Ըստ նրա՝ յուրաքանչյուր հասարակություն բաժանվում է երեք դասակարգերի. վերին խավը պետությունը ղեկավարող պլուտոկրատիան (plutos – հարստություն, kratos – ուժ, իշխանություն) է, միջին խավը ներկայացված էր զինվորականներով, մանր առևտրականներով և արհեստավորներով, իսկ ստորին խավը կազմում էր պրոլետարիատը, մարդիկ, ովքեր չունեն սեփականություն և լիովին կախված են այլ՝ առավել բարեկեցիկ քաղաքացիներից: Կարգուկանոնի գրավականը մեծաքանակ միջին խավն էր, որը միանգամայն տարբերվում է ժամանակակից միջին խավից, որին բնորոշ են սպառման բարձր մակարդակն ու որոշակի կենսաձևը:

Կարլ Մարքսը, մշակելով դասակարգային տեսությունը, շեշտում էր դասակարգերի միջև հակադրությունը՝ դասակարգերի տարբերակման հիմքում դնելով վերջիններիս սեփականությունը արտադրամիջոցների նկատմամբ: Նա պնդում էր՝ այդ հակադրությունը երբեք չի վերանա, սակայն անգամ ըստ մարքսիստական տեսության կողմնակից տեսաբանների՝ դասակարգային անտագոնիզմը ժամանակի ընթացքում կփոխակերպվի մշակութային և մտավոր կապիտալին տիրապետողների և չտիրապետողների միջև հակադրության:

Դասակարգային մոտեցման կողմնակից Մաքս Վեբերը առանձնացնում է չորս դասակարգ՝

- խոշոր սեփականատերեր,
- մտավորականներ, վարչական աշխատողներ և մենեջերներ,
- մանր սեփականատերեր,
- բանվոր դասակարգ:

Վեբերի տարբերակման հիմքում հետևյալ չափորոշիչներն են՝ կապիտալ, որակավորում և կրթություն: Այս կամ այն դասակարգին պատկանելը կանխորոշում է տվյալ անձի կյանքի շանսերը, սոցիա-

լական շարժունության հնարավորությունները: Վերերը առանձնահատուկ ուշադրություն է դարձնում միջին խավի ուսումնասիրությանը: Միջին խավը, ըստ Վերերի, ժամանակակից արևմտյան հասարակության հիմնական սոցիալական բազան և ժողովրդավարության հիմքն է: Միջին խավի սոցիալական դերը պայմանավորված է հետևյալ առանձնահատկություններով՝

- հասարակության քաղաքական կայունության պահպանման հարցում շահագրգռվածություն.

- ազատության և մարդու իրավունքների արժեքների գիտակցում.

- փոխզիջման հակվածություն և քաղաքական ծայրահեղությունները, հակասությունները հարթելու պատրաստակամություն.

- քաղաքական պահանջների զսպվածություն.

- ընտրական և այլ քաղաքական որոշումների ընդունման համեմատաբար բարձր իրազեկվածության մակարդակ:

Միջին խավն ընդգրկում է պետական ծառայողներին, մտավորականությանը, մենեջերներին, փոքր և միջին ձեռնարկատերերին, բարձր որակավորում ունեցող բանվորներին: Միջին խավի ներկայացուցիչները սովորաբար բարձրագույն կրթություն ունեն, հեղինակավոր բարձր վարձատրվող մասնագիտությունների տեր են, իսկ սեփական կենսակերպը իրենց թույլ է տալիս նույնականացնել միջին խավի հետ:

Պ. Բուրդյեն դասակարգերի հարցում բացարձակ տարբերվող նոր հայեցակարգ է առաջ քաշում: Ըստ նրա՝ Մարքսի հիմնական սխալն այն էր, որ նա իր տեսության մեջ երևակայական դասակարգերն ընկալում և ներկայացնում էր որպես իրական, իրականության մեջ գոյություն ունեցող: Իսկ Բուրդյեն, հրաժարվելով սոցիոլոգիական ռեալիզմից, ժխտում է սոցիալական դասակարգերի՝ որպես իրենց որոշակի սոցիալական և իրավական կարգավիճակն ունեցող կայուն սոցիալական խմբերի օբյեկտիվ գոյությունը: Վերջինիս կարծիքով՝ դասակարգերն օբյեկտիվ իրականությանը հատուկ երևույթ չեն: Օբյեկտիվ կապերն արտացոլում են ռեսուրսների բաշխման ոլորտում դիրքերի և կարգավիճակների միջև փոխհարաբերությունները: Իսկ այդ դիրքերը կարող են ակտիվ և արդյունավետ բնույթ ձեռք բերել սոցիալական տիեզերքում առկա սուղ ռեսուրսների յուրացման գործում: Սոցիալական տարածության մեջ սուբյեկտները տեղակայված են ըստ իրենց պատկանող տարբեր տեսակի կապիտալների հանրագումարային ծավալի և դրանում տնտեսականի և մշակութայինի հարաբերակցության: Սոցիալական տարածության մեջ դիրքով պայմանավորված կողմնորոշումները նպաստում են սուբյեկտի հարմարմանը տվյալ դիրքին: Ու. Հոֆմանը այն կոչում է «սեփական տեղի զգացողություն», որի շնորհիվ «սովորական մարդիկ» բավարարված են իրենց կարգավիճակով, իսկ մյուսները «իրենց հեռու են պահում» և «բարձր գնահատում»<sup>1</sup>:

<sup>1</sup> **Бурдые П.** Социальное пространство и символическая власть, <http://gtmarket.ru/laboratory/expertize/2006/883>

1950-ական թթ. ԽՍՀՄ սոցիալական շերտավորումն ուսումնասիրող Ա. Ինկելսը<sup>2</sup> առանձնացնում է հետևյալ սոցիալական խմբերը՝

- կառավարող վերնախավ,
- մտավորականության վերին խավ,
- մտավորականությունը կամ զանգվածային/շարքային մտավորականություն,
- «սպիտակ օձիքներ»,
- բանվոր դասակարգ,
- գյուղացիներ:

Տարբեր հեղինակների կողմից հասարակության շերտավորման մեկնաբանությունների դիտարկումը պարզորոշ վկայում է այն մասին, որ ժամանակի ընթացքում աճել է սոցիալական շերտերի ու դասակարգերի քանակը, փոփոխվել է հասարակության կառուցվածքը՝ դառնալով ավելի կառուցվածքային: Մակայն սոցիալական շերտերի քանակի ավելացման հետևանքով հասարակության վերին և ստորին շերտերն իրենց սոցիալական բնութագրիչների տեսանկյունից աննշան փոփոխություններ են կրել, իսկ միջին խավը ենթարկվել է էական կառուցվածքային փոփոխությունների՝ ոչ միայն առավել ընդարձակվելով, այլև դառնալով առավել բազմազան՝ դրանում ընդգրկված սոցիալական խմբերի տեսանկյունից:

Այնուամենայնիվ, Արիստոտելի առաջադրած սոցիալական շերտավորման շեղանկյունաձև կառուցվածքը արդիական է նաև մեր օրերում: Իհարկե, միջին խավի գործառույթները ժամանակակից աշխարհում էապես փոխակերպվել և համարվել են. սպառման հասարակության մեջ միջին խավը հանդես է գալիս ոչ միայն որպես հասարակությունը կայունացնող հատված, այլև որպես շարժիչ ուժ:

Միջին խավի ծավալը պայմանավորվում է երկու գործոնով՝

1) երկրի տնտեսական զարգացման մակարդակով: Հասարակության մինչարդյունաբերական վիճակից արդյունաբերականի և այնուհետև հետարդյունաբերականի անցմանը զուգահեռ՝ աճում են միջին խավի ծավալները.

2) դասակարգային դիրքի չափման եղանակները: Միջին խավի ծավալների վերաբերյալ չափման մեթոդները տարբեր արդյունքների են հանգեցնում:

Ինչ վերաբերում է հետարդյունաբերական հասարակություններում միջին խավի ծավալներին, ապա ժամանակակից քաղաքակիրթ հասարակության կառուցվածքը մասնագետները պատկերում են մոտավորապես հետևյալ կերպ՝ հարուստները կազմում են հասարակության 5-6%-ը, աղքատները՝ 14-15%-ը, իսկ միջին խավը՝ 80%-ը<sup>3</sup>: Տեսաբանների պնդմամբ նման սոցիալական կառուցվածքն ապահովում է հասարակության կայունությունը: Միջին խավը, լինելով հասարակության ամենաստվար հատվածը, հասարակության մեջ

<sup>2</sup> Inkeles A. *One World Emerging? Convergence and Divergence in Industrial Societies*, Westview Press, 1998.

<sup>3</sup> Реальная Россия: социальная стратификация современного российского общества, М., 2006, с. 15.

կատարում է կայունացնող դեր. մի կողմից կապող օղակ է հասարակության երկու բևեռների՝ հարուստների և աղքատների միջև, իսկ մյուս կողմից ապահովում է վերջիններիս միջև բավարար սոցիալական տարածություն, որպեսզի հասարակությունը խուսափի սոցիալական բախումներից և ճգնաժամերից: Նման իրավիճակը բնորոշ է հետադարձության բոլոր հասարակություններին:

Հետխորհրդային Հայաստանի հասարակության միջին խավի սահմանման, բացահայտման և ծավալի վերաբերյալ հիմնարար հետազոտություններ չեն իրականացվել: Սակայն զանգվածային լրատվամիջոցներում միջին խավի առկայության կամ բացակայության և ծավալների փոփոխման թեման շատ հաճախ է շահարկվում (հատկապես նախընտրական շրջանում): Տարիների ընթացքում միջին խավը նկարագրող հետազոտությունների շնորհիվ պարզ դարձավ, որ միջին խավը հասարակության բավական ընդարձակ շերտն է, որը, սակայն, էապես տարբերվում է արևմտյան գրականության մեջ բնութագրված միջին խավից և՛ ծավալներով, և՛ ապրելակերպով, և՛ կենսամակարդակով: ԵՊՀ սոցիոլոգիայի ֆակուլտետի 2010 թ. ուսումնական պրակտիկայի շրջանակում իրականացված հետազոտությամբ փորձ է արվել պարզել Հայաստանում միջին խավի ծավալները և կարևորագույն սոցիալական առանձնահատկությունները:

Որքան էլ զարմանալի է, հարցվածների սուբյեկտիվ ինքնանույնականացման միջոցով ստացվեց հետևյալ պատկերը (աղյուսակ 1). իրենց աղքատ են համարում հարցվածների 14.8%-ը, միջին խավի ներկայացուցիչ՝ 78.5%-ը, հարուստ՝ 6.7%-ը:

Աղյուսակ 1

Հասարակության ո՞ր խավին եք Ձեզ դասում

|           |        |
|-----------|--------|
| Աղքատ     | 14.8%  |
| Միջին խավ | 78.5%  |
| Հարուստ   | 6.7%   |
| Ընդամենը  | 100.0% |

Ինչպես տեսնում ենք, էմպիրիկ հետազոտությամբ ստացված պատկերը համընկնում է տեսականորեն մոդելավորված շեղանկյունաձև հասարակության շերտավորման սխեմային: Սակայն նման իրավիճակն ավելի շատ հետազոտական հարցերի է հանգեցնում: Միջին խավի հետ իրենց ինքնանույնացնող հարցվածների նման բարձր տոկոսը դարձյալ փաստում է միջին խավի բոլոր ենթաշերտերը տարբերակելու անհրաժեշտության մասին:

Ի լրումն նախորդ հարցի՝ կարելի է հիշատակել նաև հետևյալ տվյալները՝ ըստ հարցվողների 73.1%-ի՝ ապահովված են այնպես, ինչպես իրենց շրջապատի մարդկանց մեծամասնությունը (աղյուսակ 2): Այս հարցը որոշակիորեն պարզաբանում է հասարակության կողմից միջին խավի ընկալումը՝ ապրել այնպես, ինչպես շրջապատի

## Ձեր կարծիքով Դուք...

|  |        |
|--|--------|
| Նյութապես բոլորովին ապահովված չեք                                  | 14.3%  |
| Ապահովված եք այնպես, ինչպես Ձեր շրջապատի մարդկանց մեծամասնությունը | 73.1%  |
| Ավելի ապահովված եք, քան Ձեր շրջապատի մարդկանց մեծամասնությունը     | 6.9%   |
| Հիմնականում ապահովված եք   | 1.1%   |
| Այլ պատասխան   | 2.6%   |
| Դժվարանում եմ պատասխանել   | 2.0%   |
| Ընդամենը   | 100.0% |

մարդկանց մեծամասնությունը, մինևույն ժամանակ գիտակցելով, որ առկա է հասարակության մի որոշակի զանգված, որ ապրում են իրենցից վատ, և նրանք, ովքեր ավելի լավ են ապրում, սակայն իրենք/իրենց ընտանիքը ապրում է այնպես, ինչպես մեծամասնությունը: Թեև այս հարցում խոսքը նյութական ապահովվածության մասին էր, այնուամենայնիվ, այն հիմնականում բնորոշում է ոչ միայն կենսամակարդակը, այլև ապրելակերպը, սոցիալական կարգավիճակը և ինքնագագացողությունը: Այդուհանդերձ, պարզ է, որ հասարակության 78.5%-ը չի կարող ունենալ նույն կենսամակարդակը և ապրելակերպը: Առաջանում է միջին խավի բազմազանության հարցը: Արդյոք խոսքը մե՞կ, թե՞ մի քանի խավերի մասին է: Այստեղ հարկ է անդրադառնալ ևս մեկ խնդրի, որը հաճախ տեսության մեջ բանավեճերի տեղիք է տալիս՝ ի՞նչ թվով (եզակի՞, թե՞ հոգնակի) պետք է եզրույթը օգտագործել՝ «միջին խավ», թե՞ «միջին խավեր»: Հոգնակի թվով («միջին խավեր») օգտագործման կողմնակիցները, մասնավորապես Պ. Սաունդերսը<sup>4</sup> և Լ. Ա. Բեյլանան<sup>5</sup>, ընդգրծում են վերջինիս ոչ համաձայն բնույթը: Մինչդեռ եզակիով օգտագործելու կողմնակիցներն ընդգծում են միջին խավի դերը՝ որպես սոցիալական և տնտեսական հասարակությունը հավասարակշռող տարրի: Երկու մոտեցումներն էլ գիտության մեջ ունեն իրենց տեղը և դերը: Հարկ է, հաշվի առնելով համատեքստը, ճիշտ կողմնորոշվել:

Որոշ հեղինակներ միջին խավը համարում են համաշխարհային պատմության մեջ եզակի երևույթ, ենթադրելով, որ նման խավ գոյություն չի ունեցել մարդկության պատմության գրեթե ողջ ընթացքում<sup>6</sup>: Միջին խավի հավասարակշռող գործառույթը պայմանավորված է այն հանգամանքով, որ այն բաղկացած է «սեփական ձեռքերով իրենց ճակատագիրը կերտած» մարդկանցից, որոնց համար,

<sup>4</sup> **Sounders P.** *Social Class and Stratification*, L.-N.Y., 1994, p. 91.

<sup>5</sup> **Бел ева Л. А.** *Средний класс российского общества: проблема обретения социального статуса* (Соц. олог, чешк, е, сследован, , 1993, N 10, с. 13–22).

<sup>6</sup> **Добренков В. И., Кравченко А. И.** *Соц. олог, . Учебн, к, М., 2008, с. 337.*

բնականաբար, շահեկան և նպատակահարմար է այն հասարակարգի պահպանումը, որն իրենց նման հնարավորություն է ընձեռել:

Երբ խոսքը մեր հասարակության մեջ տարբեր խավերի չափաբաժնի մասին է, ապա դարձյալ ակնհայտ է, որ հարուստների վերաբերյալ հարցվողները հիմնականում միակարծիք են. հիմնական մասը (56.5%) կարծում է, որ հարուստները կազմում են մեր հասարակության մինչև 10%-ը: Իսկ ինչ վերաբերում է միջին խավի և աղքատների չափաբաժնին, ապա աղքատները հարցվողների կարծիքով կազմում են հասարակության մեջ ավելի փոքր տոկոս, քան միջին խավն է, թեև այդ տարբերությունն էական չէ (աղյուսակ 3 և գծապատկեր 1):


Աղյուսակ 3

Ձեր կարծիքով՝ Ձեր շրջապատում քանի՞ տոկոսն են կազմում...

|                          | Աղքատները | Միջին խավը | Հարուստները |
|--------------------------|-----------|------------|-------------|
| 0% - 10%                 | 19.1      | 11.5       | 56.5        |
| 11%-30%                  | 25.8      | 31.1       | 23.0        |
| 31%-60%                  | 28.0      | 31.7       | 8.3         |
| 61%-90%                  | 17.6      | 17.2       | 4.6         |
| 91% և ավելի              | 2.6       | 2.2        | 1.5         |
| Դժվարանում են պատասխանել | 6.9       | 6.3        | 6.1         |
| Ընդամենը                 | 100.0     | 100.0      | 100.0       |
| Մեղիանա                  | 31-60     | 31-60      | 0-10        |
| Մոդա                     | 31-60     | 31-60      | 0-10        |

Գծապատկեր 1

Ձեր կարծիքով՝ Ձեր շրջապատում քանի՞ տոկոսն են կազմում...



Ավելի մանրամասն նկարագրելով աղքատներին՝ հարցվողների 49.3%-ը նշում է, որ Հայաստանում աղքատ են նրանք, ովքեր աշխատանք չունեն, 19.3%-ը՝ աղքատ լինելու պատճառը ծուլանալն է, 10.9%-ը՝ աղքատ են ցածր աշխատավարձ ստացողները, 6.5%-ը՝ աղքատության պատճառը ազդեցիկ կապերի բացակայությունն է: Կրթություն կամ մասնագիտություն չունենալը նույնպես նշվել է որպես աղքատությունը պայմանավորող գործոն (3.5%):

Նույնականացնելով մեր հասարակության մեջ հարուստներին՝ հարցվողների 29.5%-ը նշեց, որ Հայաստանում հարուստ են բարձրաստիճան պաշտոնյաները, 27.3%-ը՝ շատ փող ունեցողները, 25.3%-ը՝ իշխանություն, կապեր ունեցող մարդիկ: Եվ հարցվողների միայն 4.6%-ը նշեց, որ Հայաստանում հարուստ են աշխատասեր և նպատակասլաց մարդիկ: Իսկ ըստ հարցվածների 8.7%-ի՝ հարուստների թվում ճարպիկ մարդիկ են:

Հարցվողների զգալի մասը՝ 17.7%-ը, միջին խավ է համարում աշխատանք ունեցողներին, 12.9%-ը՝ կայուն եկամուտ ունեցողներին, 8.6%-ը՝ առաջնային կենսական պահանջները ապահովել կարողացողներին, 6.9%-ը՝ մանր և միջին ձեռներեցիներին: Սոցիալ-մշակութային տեսանկյունից ուշագրավ է, որ հարցվողների 3.7%-ը նշել է՝ միջին խավին կարելի է դասել բարձր վարձատրվող աշխատանք ունեցողներին, իսկ 3.0%-ը՝ նրանց, ովքեր իրենց ոչնչից չեն զրկում: Հարցվածների 4.1%-ը միջին խավին դասել է նաև մտավորականությանը:

Քանի որ հետազոտության արդյունքների համաձայն՝ աշխատանքի առկայությունը պայմանավորում է միջին խավին պատկանելությունը, նպատակահարմար է հասկանալ մեր հասարակության մեջ աշխատանք գտնելու համար կարևորագույն նախադրյալները: Այդ նպատակով հարցվողներին առաջարկվել էր գնահատել առաջադրված գործոնների կարևորությունը Հայաստանում աշխատանք գտնելու համար: Այդ գործոնների մեծ մասը հարցվողները որակավորել են որպես «շատ կարևոր»: Ինչպես երևում է աղյուսակից, առաջին տեղում կրթությունն է, այնուհետև ծանոթություններն են: Իսկ սեռը և քաղաքական պատկանելությունը հայտնվել են աղյուսակի վերջին տողերում: Թեև ծանոթությունները, որպես կարևոր գործոն, երկրորդ տեղում են, այնուամենայնիվ, կրթությունը, մասնագիտական ունակությունները և աշխատանքային փորձը շատ են կարևորվել: Այդուհանդերձ, մասնագիտական որակները և հետևաբար աշխատանքի որակը կարևոր դեր են խաղում Հայաստանում (աղյուսակ 4):

Իսկ քիչ թե շատ արժանի դիրքի հասնելու համար Հայաստանում իրավիճակն այլ է (տե՛ս աղյուսակ 5): Առաջին տեղում կապերն ու ծանոթություններն են (26.7%), երկրորդ տեղում, սակայն ոչ մեծ տարբերությամբ, կրթությունը (21.1%), չնչին տարբերությամբ երրորդ տեղում փողն է (20.7%)՝ որպես Հայաստանում քիչ թե շատ արժանի դիրքի հասնելու կարևոր նախապայման: Եվ ապա, էապես առավել ցածր տոկոսներով՝ աշխատասիրությունը (12.8%), հաջողակությունը (7.8%) և նպատակասլացությունը (7.5%):

Ստորև թվարկվածներից յուրաքանչյուրը որքանո՞վ է կարևոր Հայաստանում աշխատանք գտնելու համար

|                                   | Բոլորովին կարևոր չէ | Ավելի շուտ կարևոր չէ | Ավելի շուտ կարևոր է | Շատ կարևոր է | Դժվարանում եմ պատասխանել |
|-----------------------------------|---------------------|----------------------|---------------------|--------------|--------------------------|
| Կրթություն                        | 3.0%                | 8.0%                 | 23.3%               | 64.3%        | 1.3%                     |
| Ծանոթություններ                   | 3.7%                | 10.0%                | 25.2%               | 59.2%        | 2.0%                     |
| Մասնագիտական ունակություններ      | 3.9%                | 10.6%                | 29.9%               | 54.2%        | 1.3%                     |
| Աշխատանքային փորձ                 | 5.4%                | 12.4%                | 27.8%               | 52.7%        | 1.7%                     |
| Ինքն իրեն ներկայացնելու շնորհք    | 7.2%                | 13.0%                | 33.4%               | 43.8%        | 2.6%                     |
| Արտաքին տեսքը                     | 10.2%               | 14.4%                | 33.1%               | 40.1%        | 2.2%                     |
| Կաշառք                            | 13.5%               | 24.6%                | 22.2%               | 37.6%        | 2.2%                     |
| Սեռ                               | 33.0%               | 26.7%                | 23.0%               | 13.9%        | 3.5%                     |
| Այս կամ այն քաղաքական ուժին հարել | 29.1%               | 34.7%                | 16.7%               | 12.4%        | 7.1%                     |

Այսպիսով, միջին խավի ներկայացուցիչ լինելու համար անհրաժեշտ նախապայման է կայուն աշխատանք ունենալը, որն իր հերթին ձեռք է բերվում համապատասխան կրթության, մասնագիտության և որակավորման դեպքում, իսկ ահա մասնագիտական առաջընթացի խնդիրը լուծվում է հիմնականում ծանոթությունների և կապերի շնորհիվ:

Ի՞նչ է անհրաժեշտ այսօր Հայաստանում քիչ թե՛ շատ արժանի դիրքի հասնելու համար

|                                       |        |
|---------------------------------------|--------|
| Ծանոթություններ, կապեր                | 26.7%  |
| Կրթություն                            | 21.1%  |
| Փող                                   | 20.7%  |
| Աշխատասիրություն                      | 12.8%  |
| Հաջողակություն                        | 7.8%   |
| Նպատակալացություն                     | 7.5%   |
| Այս կամ այն քաղաքական ուժին պատկանելը | 1.7%   |
| Ծննդավայր                             | 0.5%   |
| Խելացիություն                         | 0.4%   |
| Դժվարանում եմ պատասխանել              | 0.8%   |
| Ընդամենը                              | 100.0% |

Այն փաստը, որ կայուն աշխատանքը և կայուն աշխատավարձը միջին խավի ձևավորման կայուն հիմքն են, կասկած չի հարուցում: Եվ մեր հասարակության մեջ զբաղվածության ոլորտում կայունացման միտումները և հետևաբար, միջին խավի ձևավորման և կայունացման միտումներն ակնհայտ են: Այս դրույթի լավագույն ապա



ցույց են հայաստանյան ընտանիքների հիմնական եկամտի աղբյուրների վերաբերյալ տվյալները (աղյուսակ 6):

Աղյուսակ 6

Ստորև թվարկվածներից որո՞նք են Ձեր ընտանիքի եկամտի հիմնական աղբյուրները

|  |       |
|--|-------|
| Հիմնական աշխատանքից ստացվող աշխատավարձ                                     | 65.1% |
| Միանգամյա կամ կարճաժամկետ աշխատանքների դիմաց ստացվող գումարներ             | 9.5%  |
| Մեփական ձեռնարկությունից (ինքնազբաղվածությունից) ստացված շահույթ           | 7.6%  |
| Մեփականությունը վարձով տրամադրելուց ստացված վարձավճար                      | 4.3%  |
| Տոկոսադրույքներից ստացված եկամուտներ                                       | 0.9%  |
| Ապրանքների, այդ թվում՝ գյուղատնտեսական ապրանքների վաճառքից ստացված եկամուտ | 2.6%  |
| Արտասահմանում գտնվող բարեկամներից ստացվող դրամական օգնություն              | 15.4% |
| Հայաստանում գտնվող բարեկամներից ստացվող դրամական օգնություն                | 3.7%  |
| Նպաստներ   | 3.9%  |
| Կենսաթոշակները և այլ տեսակի թոշակներ                                       | 27.1% |
| Այլ  | 0.4%  |
| Հրաժարվում եմ պատասխանել   | 2.8%  |

Ինչպես երևում է աղյուսակից, հայաստանյան ընտանիքների մեծ մասի համար հիմնական աշխատանքից ստացվող աշխատավարձը ընտանեկան եկամտի հիմնական աղբյուրն է (65.1%), 27.1%-ի համար՝ կենսաթոշակն ու այլ տեսակի թոշակները, բավական կարևոր դեր է խաղում նաև արտասահմանում գտնվող բարեկամներից ստացվող դրամական օգնությունը՝ 15.4%: Եկամտի այլ աղբյուրները զգալիորեն փոքր տոկոս են կազմում:

Ուշագրավ են նաև Հայաստանում աշխատուժի՝ ըստ տնտեսության տարբեր ոլորտների բաշխման վերաբերյալ տվյալները (աղյուսակ 7): Աշխատուժի զգալի զանգվածն ընդգրկված է կրթության ոլորտում՝ 14.2%, 12.0%-ը՝ սպասարկման, 10.4%-ը՝ առողջապահության, 7.7%-ը՝ արդյունաբերության, 7.1%-ը՝ առևտրի, 3.8%-ը՝ շինարարության, իսկ 3.8%-ը աշխատում են տեղեկատվական համակարգերի և ՁԼՄ-ների բնագավառում, 3.3%-ը՝ հասարակական կազմակերպություններում, 2.7%-ը՝ ֆինանսական ոլորտում, 2.2%-ը՝ մշակույթի, 1.6%-ը՝ կոմունալ ծառայությունների, 1.6%-ը՝ գիտության, 1.1%-ը՝ տրանսպորտի, 0.5-ական %-ը՝ սպորտի ոլորտում, ուժային կառույցներում, միջազգային կազմակերպություններում, քաղաքական կուսակցություններում ու միավորումներում:

Աշխատանքը և զբաղվածությունը կարևոր են ոչ միայն որոշակի կենսամակարդակի ապահովման առումով, այլև որոշակի ապրելակերպի ձևավորման առումով: Շատ խոսուն են այդ առումով միզրա-

## Զբաղվածության ոլորտը

|  |        |
|--|--------|
| Կրթություն                               | 14.2%  |
| Սպասարկում                               | 12.0%  |
| Առողջապահություն                         | 10.4%  |
| Արդյունաբերություն                       | 7.7%   |
| Առևտուր                                  | 7.1%   |
| Շինարարություն                           | 3.8%   |
| Ինֆորմացիոն համակարգեր/ ՁԼՄ              | 3.8%   |
| Հասարակական կազմակերպություններ          | 3.3%   |
| Բանկեր/ ֆինանսներ                        | 2.7%   |
| Մշակույթ                                 | 2.2%   |
| Կոմունալ ծառայություններ                 | 1.6%   |
| Գիտություն                               | 1.6%   |
| Տրանսպորտ                                | 1.1%   |
| Սպորտ                                    | 0.5%   |
| Ոստիկանություն/զինված ուժեր              | 0.5%   |
| Միջազգային կազմակերպություններ           | 0.5%   |
| Քաղաքական կուսակցություններ/միավորումներ | 0.5%   |
| Այլ                                      | 26.2%  |
| Ընդամենը                                 | 100.0% |

ցիոն գործընթացների վերաբերյալ հարցվողների պատասխանները (աղյուսակ 8): Ինչ վերաբերում է արտերկիր մեկնելու հաճախականությանը, ապա ամիսը մեկ արտերկիր են մեկնում հարցված ընտանիքների 0.2%-ը, տարին մի քանի անգամ՝ 6.5%-ը, տարին մեկ՝ 7.8%-ը, մի քանի տարին մեկ՝ 10.4%-ը, միայն մեկ անգամ՝ 6.5%-ը:

## Ի՞նչ հաճախականությամբ են/եք Դուք/ Ձեր ընտանիքի անդամները մեկնում արտերկիր

|                          |        |
|--------------------------|--------|
| Ամիսը մեկ անգամ          | 0.2%   |
| Տարին մի քանի անգամ      | 6.5%   |
| Տարին մեկ անգամ          | 7.8%   |
| Մի քանի տարին մեկ անգամ  | 10.4%  |
| Մեկ անգամ եմ/են մեկնել   | 6.5%   |
| Երբեք չեն մեկնել         | 66.4%  |
| Դժվարանում եմ պատասխանել | 2.2%   |
| Ընդամենը                 | 100.0% |

Կարևոր է նաև նշել, որ պարբերաբար արտերկիր մեկնողների հիմնական մասը՝ 17.4%-ը, մեկնում է աշխատանքային ուղևորության (աղյուսակ 9):

Աղյուսակ 9

Ի՞նչ նպատակով եք/են մեկնել

|   |       |
|---|-------|
| Աշխատանքային ուղևորություն                          | 17.4% |
| Մշտական բնակություն                                 | 3.7%  |
| Հանգիստ, զբոսաշրջություն                            | 9.1%  |
| Ուսում, վերապատրաստում                              | 2.6%  |
| Այցելություն հարազատներին, բարեկամներին, ընկերներին | 5.9%  |
| Այլ   | 1.7%  |

Հաջորդ հարցի պատասխանները վկայում են երկրում որոշակի միջին կենսամակարդակի կայունացման մասին: Հարցվողների 36.2%-ը, բնութագրելով ընտանիքի նյութական ապահովվածության մակարդակը, նշում է, որ «դրամը բավականացնում է բոլոր կարիքները հոգալու համար, սակայն խնայողություններ անել նրանք չեն կարող» (աղյուսակ 10): Բարձր է նաև այն հարցվողների տոկոսը, ովքեր իրենց նյութական ապահովվածության մակարդակը բնութագրում են հետևյալ կերպ՝ «դրամը բավականացնում է միայն սննդի համար»: Ծայրահեղ վատ՝ «դրամը չի բավականացնում ընդհանրապես», իրենց նյութական ապահովվածությունը բնութագրող հարցվողները կազմում են 14.5%, իսկ լավագույնս իրենց նյութական ապահովվածության մակարդակը բնութագրողները՝ «դրամը բավականացնում է ամեն ինչի համար, մենք մեզ ոչնչից չենք զրկում»՝ 7.4%: Ուշագրավ է այն հանգամանքը, որ այս տվյալները համապատասխանում են ըստ հետազոտության վերոհիշյալ տվյալների՝ մեր հասարակության մեջ աղքատների և հարուստների չափաբաժնին:

Աղյուսակ 10

Ինչպե՞ս կբնութագրեք Ձեր/Ձեր ընտանիքի նյութական ապահովվածության մակարդակը

|   |        |
|---|--------|
| Դրամը չի բավականացնում ընդհանրապես  | 14.5%  |
| Դրամը բավականացնում է միայն սննդի համար   | 24.3%  |
| Դրամը բավականացնում է ինչպես սննդի, այնպես էլ հագուստի համար, սակայն կրթական և առողջապահական ծառայություններից չենք կարողանում օգտվել | 14.5%  |
| Դրամը բավականացնում է բոլոր կարիքները հոգալու համար, սակայն խնայողություններ չենք կարողանում անել                                     | 36.2%  |
| Դրամը բավականացնում է ամեն ինչի համար, մեզ ոչնչից չենք զրկում   | 7.4%   |
| Դժվարանում եմ պատասխանել  | 3.0%   |
| Ընդամենը  | 100.0% |

Բնական է, որ հասարակության շերտավորման օրինաչափությունները և չափորոշիչները պայմանավորում են նաև հասարակության անդամների արժեհամակարգը: Եթե սոցիալական արժեք ասելով

հասկանում ենք որոշակի բացարձակ նպատակներ, գաղափարներ, իդեալներ, որոնց որպես ուղեցույց է դիտարկում հասարակությունն ամբողջությամբ, ապա արժեհամակարգն առավել անհատական և հարաբերական բնույթ է կրում: Հետագոտական տեխնոլոգիաները հնարավորություն են ընձեռում պարզելու, թե որ արժեքներն են կողմնորոշիչ հարցվողների համար տանը և աշխատավայրում, որքանով են համապատասխանում անհատական և հասարակական գաղափարները: Միջազգային ուսումնասիրությունները ցույց են տալիս, որ միջին խավի ներկայացուցիչների համար առաջնահերթ արժեքներ են «լավ կրթությունը», «լավ ունակությունները», «աշխատասիրությունը» և «ծանոթությունները»: Միջազգային միտումների հետ հայաստանյան հասարակության արժեհամակարգը համեմատելու նպատակով փորձեցինք դասակարգել հարցվողների կյանքում առավել կարևոր ոլորտներն ու արժեքները և հարցվողների պատասխանների հիման վրա ստացանք հետևյալ պատկերը: Հատկապես կարևորվում են «աշխատանքը, պաշտոնը», երկրորդ տեղում «Հայաստանի անկախությունն» է, երրորդը՝ «ազատությունը», այնուհետև «հարստությունը, բարեկեցությունը», «կրթությունը և մասնագիտությունը» և այլն (աղյուսակ 11):

Ակնհայտ է, որ հարցվողները աշխատանքը և պաշտոնը, ինչպես նաև մասնագիտություն և կրթություն ունենալը շատ են կարևորում: Սա վկայում է երկրում մշակութային կապիտալի զարգացման հասունացած անհրաժեշտության, ներուժի և առկա միտումների մասին: Մշակութային կապիտալը, որպես նոր սոցիալական դասակարգի կարևորագույն հատկություն, առաջ է քաշում Ա. Գոուլդները<sup>7</sup>: Նա ժամանակակից արևմտյան հասարակության մեջ առանձնացնում է երեք դասակարգ՝ կապիտալիստներ, պրոլետարիատ և նոր դասակարգ, որը առանձնանում է մշակութային կապիտալով (գիտելիքներ և որակավորում) և կրիտիկական դիսկուրսի մշակությամբ (առանձնահատուկ լեզվական համախմբություն): Այս նոր դասակարգին են դասվում տարբեր որակավորում ունեցող մասնագետները՝ ճարտարագետները, մենեջերները, աուդիտորները, հաշվապահները, վարչական աշխատողները, լրագրողները, դասախոսները, ուսուցիչները և այլն: Մի կողմից Ա. Գոուլդները հակադրում է մշակութային կապիտալը դրամական կապիտալին, մյուս կողմից պնդում է, որ մշակությամբ դառնում է կապիտալ, երբ դառնում է կայուն եկամտի աղբյուր: Դ. Բեյլը անգամ առաջարկում է կոգնիտարիատ (կոգնիտոս հունարեն նշանակում է գիտելիք) եզրույթը: Կոգնիտարիատի ներկայացուցիչները զբաղված են մտավոր աշխատանքով, ի տարբերություն պրոլետարիատի, որի ներկայացուցիչները զբաղված են ֆիզիկական աշխատանքով: Սակայն երկուսն էլ վարձու աշխատողներ են<sup>8</sup>: Հիշատակելով միջին խավը նկարագրող տեսական հայեցակարգերը՝ հարկ է նշել, որ արևմտյան հասարակության միջին խավի ներկայացուցիչների համար բնութագրող են նաև այնպիսի

<sup>7</sup> Gouldner A. *The Future of Intellectuals and Rise of the New Class*. N.Y., 1979, pp. 23-26.

<sup>8</sup> Белл Д. *Грядущее постиндустриальное общество*, М., 1999.

նահատկություններ, ինչպիսիք են պարտաճանաչ հարկերի վճարումը, սոցիալական և քաղաքական ակտիվությունը, որոշումների կայացման գործընթացում մասնակցությունը: Հաջորդիվ, աղյուսակում զետեղված տվյալների համաձայն, սոցիալական և քաղաքական ակտիվությունը, առավել ևս որոշումների կայացման գործընթացին մասնակցությունը այնքան էլ բնորոշ չեն մեր համաքաղաքացիներին, սակայն հարկերի բարեխիղճ վճարումը աստիճանաբար վերածվում է սովորական, կանոնավոր վարքագծի (աղյուսակ 12):

Իրենց սոցիալական պասիվությունը հարցվողների 40.8%-ը բացատրում է հետևյալ կերպ. «Ես չեմ մասնակցում հասարակական-քաղաքական իրադարձություններին, քանի որ չեմ հավատում, որ իմ մասնակցությունն ինչ-որ բան կփոխի», 14.7%-ը չի մասնակցում հասարակական-քաղաքական իրադարձություններին, քանի որ չունի որոշակի քաղաքական դիրքորոշում, 8.7%-ը՝ չի ցանկանում պատասխանատվություն կրել, իսկ 7.1%-ը՝ չի հետաքրքրվում, թե ինչ է տեղի ունենում երկրում, 3.7%-ը՝ այլ պատճառներ: Իսկ հասարակական-քաղաքական իրադարձություններին մասնակցող փոքրամասնությունը հետևյալ կերպ է բացատրում իր ակտիվությունը. մասնակցում է, որպեսզի արտահայտի իր քաղաքացիական կամքը և որոշակի ազդեցություն ունենա երկրի վրա (4.3%), հարկադրված է այդպես վարվելու (2.4%), մասնակցում է, քանի որ ունի որոշակի քաղաքացիական դիրքորոշում (4.1%), առաջնային է սեփական ընտրական իրավունքի իրացումը (5.0%), մասնակցում է, քանի որ իրեն խնդրում են ընտանիքի անդամները, ընկերներն ու ծանոթները (1.7%):

Աղյուսակ 11

Ստորև թվարկվածներից յուրաքանչյուրը որքան՞ով է կարևոր Ձեր շրջապատի մարդկանց համար

|  | Շատ կարևոր է | Հիմնականում կարևոր է | Հիմնականում կարևոր չէ | Ընդհանրապես կարևոր չէ | Դժվարանում եմ պատասխանել |
|--|--------------|----------------------|-----------------------|-----------------------|--------------------------|
| Աշխատանք, պաշտոն                                     | 66.4%        | 27.3%                | 3.0%                  | 2.0%                  | 1.3%                     |
| Հայաստանի անկախություն                               | 61.2%        | 23.4%                | 9.5%                  | 3.7%                  | 2.2%                     |
| Ազատություն  | 60.3%        | 29.3%                | 6.1%                  | 1.7%                  | 2.6%                     |
| Հարստություն, բարեկեցություն                         | 60.3%        | 28.9%                | 6.3%                  | 2.8%                  | 1.7%                     |
| Կրթություն, մասնագիտություն                          | 57.8%        | 33.7%                | 5.7%                  | 1.3%                  | 1.5%                     |
| Օրինականություն                                      | 52.9%        | 28.0%                | 11.9%                 | 4.3%                  | 2.8%                     |
| Կրոն/ հավատք   | 48.6%        | 35.4%                | 11.3%                 | 2.4%                  | 2.4%                     |
| Սոցիալական արդարություն                              | 46.7%        | 29.1%                | 15.2%                 | 4.8%                  | 4.1%                     |
| Հավասարություն                                       | 44.6%        | 29.6%                | 18.5%                 | 4.3%                  | 3.0%                     |
| Մեփական հայացքները ազատ արտահայտելու հնարավորություն | 43.3%        | 34.6%                | 13.0%                 | 5.0%                  | 4.1%                     |
| Ազգային ավանդույթներին հետևելը                       | 36.7%        | 38.0%                | 19.1%                 | 4.6%                  | 1.7%                     |

|                               |       |       |       |       |      |
|-------------------------------|-------|-------|-------|-------|------|
| Մեփական երկրի հոգսերով ապրելը | 17.7% | 24.5% | 30.4% | 23.0% | 4.4% |
|-------------------------------|-------|-------|-------|-------|------|

Աղյուսակ 12

## Որքան՞ վ եք համաձայն հետևյալ դատողություններին

|  | Լիովին համաձայն եմ | Հիմնականում համաձայն եմ | Հիմնականում համաձայն չեմ | Բոլորովին համաձայն չեմ | Դժվարում եմ պատասխանել |
|--|--------------------|-------------------------|--------------------------|------------------------|------------------------|
| Բարեխղճորեն վճարում են հարկերը                               | 34.1%              | 36.0%                   | 14.8%                    | 8.0%                   | 7.1%                   |
| Սոցիալական ակտիվություն են ցուցաբերում                       | 7.0%               | 21.5%                   | 37.6%                    | 21.3%                  | 12.6%                  |
| Քաղաքական ակտիվություն են ցուցաբերում                        | 8.7%               | 21.7%                   | 39.3%                    | 23.0%                  | 7.4%                   |
| Մասնակցություն են ունենում որոշումների կայացման գործընթացում | 7.8%               | 15.9%                   | 34.1%                    | 32.8%                  | 9.3%                   |

Ամփոփելով շարադրանքը՝ կարելի է եզրահանգել, որ զարգացած հետարդյունաբերական հասարակությունների շեղանկյունաձև կառուցվածքը, ըստ ինքնանույնականացման ցուցիչների, առկա է նաև Հայաստանում, քանի որ հարցվածների 78.5%-ը իրեն համարում է միջին խավի ներկայացուցիչ: Ընդամին կարևոր է շեշտել, որ հայաստանյան միջին խավի բնութագրիչները էապես տարբերվում են եվրոպական հասարակությունների միջին խավի բնութագրիչներից: Մի կողմից հասարակության շերտավորման և միջին խավի ձևավորման առումով կարևոր են կրթությամբ, մասնագիտությամբ և ծանոթություններով պայմանավորված զբաղվածությունը, աշխատանքը և պաշտոնը, որն ապահովում է որոշակի կենսամակարդակ ու ապրելակերպ: Դա թույլ է տալիս մարդկանց համարել, որ իրենք ապրում են այնպես, ինչպես շրջապատի մարդկանց մեծամասնությունը: Իսկ մյուս կողմից այնպիսի բնութագրիչներ, ինչպիսիք են սոցիալական և քաղաքական ակտիվությունը, որոշումների կայաց-

ման գործընթացում մասնակցությունը բոլորովին բնորոշ չեն հայաստանյան միջին խավին: Հարկ է նշել նաև, որ հարկերի բարեխիղճ վճարումը աստիճանաբար դառնում է միջին խավի ապրելակերպին բնորոշ երևույթ, սակայն այն դեռևս չի ընկալվում և չի գիտակցվում որպես հասարակության համար էական որոշումներին մասնակցության իրավունք ու գրավական:

### **СРЕДНИЙ КЛАСС В АРМЕНИИ**

(количественный анализ и основные характеристики)

МЕЛКУМЯН Ю. Г.

#### **Резюме**

В 2010 году была сделана попытка измерения размеров среднего класса в Армении и выделения его наиболее важных социальных характеристик. На основании субъективной самоидентификации опрошенных была получена следующая картина: бедными себя считают 14.8% опрошенных, представителями среднего класса - 78.5%, а богатыми – 6.7%. Очевидно, что картина, полученная на базе эмпирических данных, совпадает с теоретической моделью ромбовидной структуры общества.

Ромбовидная структура развитого постиндустриального общества актуальна и для современной Армении, в частности в плане самоидентификационных показателей. Наряду с этим важно отметить, что характеристики среднего слоя в Армении существенно отличаются от характеристик среднего слоя развитых европейских стран. С одной стороны, с точки зрения стратификационной структуры и формирования среднего класса выделяются такие параметры, как занятость, работа и должность, которые в свою очередь являются результатом уровня образования, профессии и социальных связей, что в целом обеспечивает определенный уровень обеспеченности и образ жизни. А с другой стороны, такие характеристики, как социальная и политическая активность, участие в процессе принятия решений совершенно не свойственны среднему классу Армении.